



En Galicia xa "non se sabe tocar as campás" e tampouco "se entenden" , reflexionou Xosé Luis Barreiro Rivas, director autonómico da Universidad Internacional Menéndez Pelayo (UIMP) na conferencia inaugural do curso "Dende o badal ao clic", que estase a desenvolver ata o vindeiro sábado en Gondomar. "Sucede que a sociedade xa non o necesita", engadiu. A intervención de Barreiro Rivas centrouse na crise do modelo rural tradicional e os seus imaxinarios sociais até o baleiro de estratexias alternativas na que se atopa, ao seu entender, o país nestes intres.

O acto inaugural desenvolvido na Aula de Cultura Ponte de Rosas (sede do IEM), contou tamén coa presenza da deputada provincial Marta Iglesias, quen felicitou á organización polos máis do medio centenar de persoas chegadas de toda Galicia, que responderon ao convite e matricularonse no curso. Nese senso, informou que a colaboración entre Deputación de Pontevedra e a UIMP -de máis de 20 anos- aposta agora pola descentralización e puxo como exemplos as actividades desenvolvidas este ano en Pontevedra, Vigo, Cambados, Forcarei e esta en Gondomar.

Pola súa banda, José Eladio Ferrero Fontenla, director do curso, agradeceu a UIMP a confianza depositada no IEM para que o Val Miñor conte novamente cuns dos cursos desta prestixiosa institución. Logo de dar a benvinda aos participantes, lembrou que o tema que motiva este encontro, naceu nunha conversa sostida con Barreiro Rivas no ano 2009, logo de rematar

Escrito por Redaccion @valminorinfo
Xoves, 06 Setembro 2012 22:24

os cursos sobre arqueoloxía da UIMP, desenvolvidos nesta mesma sede. Daquela, as visibles transformacións que estaba a vivir a Galicia rural e periurbana, levounos a madurar esta iniciativa que concretase nestas xornadas.

A sesión inaugural tamén contou cunha intervención de Marcial Gondar Portosany, quen manifestou a necesidade de reconquistar os valores positivos da cultura tradicional, ser críticos cos novos modelos culturais vencellados á sociedade do consumo, e atopar estratexias sedutoras que permitan achegarlos ás novas xeracións.

Finalmente, Antonio Soliño Troncoso presentou un coloquio sobre a arquitectura dos pazos, senlleira e distintiva do país, a través dun análise dos actuais desafíos no mantemento deses patrimonios. Nomeadamente traballou sobre a Pouza de Vilares (Vilaza - Gondomar) e o Pazo do Conde de Gondomar (Gondomar). Rematando a xornada cunha visita guiada a este último.

O curso continuará este venres 7 de setembro ás 17 horas coas intervencións de Gerardo Pereira Menaut (USC) e Ofelia Rey Castelao (USC) sobre "A organización territorial no rural. Evolución histórico-social, política e administrativa". Posteriormente, terá lugar unha mesa redonda sobre "A formación e transformación do sistema de hábitat rural" integrada por especialistas no eido urbanístico e arquitectónico, coordinada por Vicente Pintos Santiago (IEM). A xornada rematará cunha visita guiada por Xosé Lois Vilar (IEM) ao casco histórico de Baiona.